

皇朝經世文續編

皇朝經世文續編卷六十八目錄

兵政七 保甲

請實行保甲疏

上裕撫軍論防禦事宜書

粵西團練略序

庵言一則

答某友書

覆文任吾書

上督撫憲緊要事宜歸入善後籌議五條

團練說

黃特軒傳

現飭通行保甲守助之法並請 飭部詳定就地正法章程疏

通飭順天畿東各州縣編查保甲示

民團論

保甲論

漁團條例示

救時芻言一則

宗稷辰

楊士達

龍啓瑞

李祖陶

熊少牧

曾國藩

魁聯

朱孫詒

吳敏樹

張之洞

周金章

葛士清

葛士清

邵友濂

張煥綸

皇朝經世文續編卷六十八

上海葛士溶子源輯

兵政七 保甲

請實行保甲疏 咸豐元年七月

監察御史 宗稷辰

竊臣伏見 皇上命中外奉行保甲要政各直省奏覆者惟閩浙雲南敬讀 申諭諄諄所以端治本於伍版者至明且切使上官選良有司無地不得其人無人不盡其心力則此事可以必要其成不致如向來年終一奏沿爲具文從此億兆之動靜不欺而守令之彰瘡易措信爲致太平之基也 臣自嘉慶年間蒙稚之日隨任讀書時 臣父原任湖南知縣 臣宗霈正於華容零陵等縣力行保甲見按戶親查接牌標對按簿考稽種種煩重而隨地隨時旁參互證之處極用周詳華容牌冊經兩年餘而始成撫臣廣厚且通飭各屬仿照行之迨調任零陵行之垂成而以勞瘁沒於任所迄今四十年此中肯綮 臣知之甚悉念之未敢忘也茲幸逢 皇上勤施良法策勵庶官之際羣言並進不棄芻蕘伏念諸臣所陳保甲章程法已備矣而行法之曲折變通或未盡晰 臣初膺臺職何敢語襲雷同惟舉趨庭所聞於此時徧行保甲有可補裨毫髮者竊不自量妄爲疏列十條恭呈 御覽可否 勅下各疆吏稍備採擇出自 聖裁

一保甲宜久任州縣爲之以收實效也四境之內大者數十萬戶小者數萬戶必令家至戶說非數年之功不能徧邊省地廣之區尤難徧歷設該牧令辦有規模忽令調任他缺抑或因差公出數月輟功署員無暇爲此卽本員回任已覺接續多疏所以行保甲必先得賢牧令旣得賢牧令便須使之久任不可輕換辦成之處又須擇一好官接替庶幾牌冊皆實民隱畢呈而董戒漸摩次第可以施布然所貴乎良有司

者必須耐煩耐勞有威有愛其心體貼周至惟恐費民錢粟荒民功夫使民不忍不從不敢不從於是行之有效近日州縣其劣者多事觀望其賢者亦懼處分錢糧命盜不悞已爲循分而欲其一心力於保甲探善政之源非上司知人任人盡去庸劣請寬處分省乃遷調則所謂保甲者仍恐徒飾其名而莫謀其實也故重牧令之久任實保甲之要端也

一保甲未能限定時日宜寬其期以致實力也他政可以勒爲定限督令一律完竣獨保甲有所不可曾見大吏剋期辦義穀義學不一年申報已齊迨去任而所辦皆廢可見責之太急勢必人盡爲欺欺飾者之整齊迅速較實行者有百倍之易上司喜其能事受欺者多轉病實力緩成爲無用此在通都劇邑尤坐此弊儻有覆奏言催令早完或保速成之員以爲式者必爲草率從事未嘗究心於此中甘苦者也故期限之從容乃保甲之實濟也

一保甲於填寫時宜加意覈對以杜虛捏也州縣於編保之初先令鄉保草開各戶丁口生理然後填寫門牌及編聯底冊與循環二簿此時最須詳細覈對蓋初填一失其實則此後全屬子虛不可不慎也至循環更換之時須看其一保一甲中往來增減有無捏造全在遇便抽查非持之有恆鮮克有濟若該保該甲內有非常之事原許隨簿密呈善於辦保甲者往往有匪必擒不疾而速如左輔之治巢縣姚瑩之治龍溪皆近人所傳誦若初填任誣復查罔據雖欲稽察將不知爲誰何故期保甲之有實功必飭查填之無譌謬也

一保甲宜不拘時地隨在稽覈以致精詳也州縣與民相親在城則校士講書收詞審案日接保甲中人往鄉則勸農催糧勘山相驗日履保甲中地逢人詢其家口與其隣右則牌冊之悞者可以悉更隨地辨其

族類與其里居則循環之僞者可以立見始而一隅爲所洞察漸而四境靡弗真知由此而悍民游民非爲之民時加密訪不雖爬梳而剔決之革澆俗以此銷亂萌亦以此故求保甲之實效尤在牧令之真心也

一保甲宜先籌經費以杜擾累也州縣辦理編查鄉保多不知書寫又未諳條款必須紳士協導之書吏分任之然紳士書吏往鄉同一不能楊腹其飯食與刷印紙張筆墨所費不少牧令當先籌捐此款不使董事及胥役官人到門分文累及百姓則必人人信從鼓舞謂此事真衛民而不以累民可經久而不敝故責保甲之所由成必首問經費之所從出也

一保甲宜酌用委員以資襄助也北省民少而壤地狹則編保較易南省民衆而政務煩則編保殊難若山陬僻境一牧令之耳目可周至於衝途大缺日給不遑則勢不得不借資寮屬以分稽察承簿本少應辦公事該道府慎選廉勤之員以助州縣或擇教職中通達事理年力尙強者贊之皆由牧令籌給薪水如能辦有成效酌予獎勵儻稍有需索不難參撤如此則不至地大者保甲轉虛民衆者編查失實矣故查保甲之始有時非獨力所能爲而考保甲之成要必得賢員而共理也

一保甲宜先查巨族再編小姓以爲聯屬也各省巨室每以門牌爲編氓小民所懸多不從實書寫有司忽於巨室而專查散處小姓何能使之勤守望睦井里乎巨聞江右閩粵民多聚族而居其族長鄉正誠得端人爲之一族中匪類有所不容地方官勾攝人犯常賴其協捕是以祠譜修明之處其人民皎然難欺不特一方之民族無可假冒而一鄉之良莠無可掩藏惟先勸導大戶樂於遵從而後推及單門咸得稽覈故欲於保甲皆真確必當視紳民無偏私也

一保甲可與坊里並稽以杜欺隱也凡民在城分坊巷在鄉分都圖各州縣舊設魚鱗冊實與保甲法相爲表裏里黨確知其定在則蒙混已絕於平時人民習見其定名則浮僞可杜於他日遇有偏災歉歲小蠲大恤臨時無事周張衙狐衿蠹無所施其伎倆果使保甲魚鱗二冊皆秩然可考州縣乃易治矣故保甲之利一興而坊里之弊亦盡去也

一保甲能實行而讀法之典可徧舉也從前各鄉鎮皆設申明亭教誡鄉民近日亭多傾圯惟有地方官選擇鄉約正副宣講聖諭廣訓一事間有奉行者臣憶嘉慶十六七年間臣父臣宗霈知華容縣時於力行保甲之中卽寓申明化導之意遴一鄉中端正紳耆有人望者爲約正副加以禮聘率之分教歲時設宴如鄉飲禮量其勤而獎之三年不怠許上官給扁獎勵會詳經撫臣廣厚通飭各屬一體照行迨十八年以後續有條陳定制更爲詳備然至今或行或不行良以查保甲者不清則貞邪未辨而教化亦無由而興也故臣以爲懸讀法之書必先覈保甲之實也

一保甲能實行而兵食之足可兼寓也昔明臣王守仁巡南贛時創行保甲而民盡知兵遂得痛除盜藪又明臣劉宗周奏議謂備禦自保甲法始內分修練備儲爲四事且寓社倉法於其間皆得周官遺意今楚粵皖豫川黔之交徐兗蘇湖之界在在有匪徒出沒而患先見於廣西及今於無事地方清編保甲司牧得人一面選其丁壯時其糗糧守望既嫻加以訓練農隙調入城中合操庶使良民隱然成爲勁旅不但可以備禦本境兼並爲方州豫養緩急可恃之材推行盡利莫善於此臣以爲得保甲之道更可收團練社倉之益也

上裕撫軍論防禦事宜書

楊士達

昨承詢地方利弊輒以團練事宜上陳意有未畢請暢論之江西東連閩浙西接荆湖北控淮南南通交廣固川陸一大都會也然而僻在南服川谷環繞藏淵萃藂莠萌防禦之道當豫庶消患於無形且夫思患預防之道城可恃者則以守城爲安城不可恃者則以四鄉爲守江西當吳楚閩粵之交萬一有事腹背受敵郡邑城池不皆可恃是莫如守四鄉保甲者鄉人所恃以無恐也今雖通省奉行保甲具文近者海氛不靖幾於遠近騷然急宜整頓以收保甲之實效整頓不必拘十戶爲牌十牌爲甲十甲爲保之舊但隨其村落所在設立村長村長之多寡視村莊大小爲準立村長由公舉不由官務使各相董率又發給印單按戶書其姓名習業申禁令嚴稽察是雖未足以弭盜實足以懾土寇之氣遏大盜之萌何則盜賊入境必恃內應猶物必先朽而後蟲生果能嚴行保甲按戶編籍出必稽其所自往入必詰其所自來其內應無由生奸細蔑由匿綫索既除雖大盜亦不敢輕入此保甲足以守四境之大驗也若夫江南沿海團練之法宜就其地勢所便合數村團爲一總而於各村中設立練長練長卽以村長承充其人必公舉有威望且公正服衆者以專責成至鄰境接壤之處又必細察情形某地爲要害處所某鄉某水某山爲出入往來必經之道則於某處設一大總而使附近各村應之一村有警首尾策應鄉自爲守人自爲防無徵發之勞有敵愾之用旣省軍糧尤資捍衛雖未足以破賊固可以作官軍之鄉導壯官軍之聲勢矣行團練不許蓄大砲以杜奸萌但戶出一丁授之器械使習於家以時日集而教之視藝之高下爲賞罰寇至則閉寨登陴而官出精兵以牽制賊勢寇攻則救寇退則追俾奔竄而不得反襲俾楊腹而無所得食然後因敵之勞而以逸勝之伺賊之隙而以飽勝之此團練之益也雖然未可恃也左氏傳曰鄆人軍其郊必不戒兵法自戰其地爲散地蓋自戰其地則室家妻子之戀足長其怯而餒其氣餒且怯未有不憤事者今試行團練之法於四鄉而鄉村之中近者相距一二里遠者十數里地

隔力分非若兵弁之萃於一營充村長者皆鄉曲交游非若弁員之臨其屬有嚴法重罰之可鼓其氣且寇盜之來飄忽無定或夜深劫殺或分道剽掠鄉村不習金鼓膽氣未堅各顧其家易至潰散散則力弱如獵狐兔昔嘉慶間川陝團勇死於教匪者以千百計職是故也故欲行團練莫如奏請築寨查寨保之策當嘉慶初教匪雲擾秦蜀楚行之頗著成效今試言其利州縣城垣廣隘不同其必不足以容一縣之人則同且距城遠者雖欲入保寇至有莫及之勢惟四鄉寨堡一立則室家皆聚鄉勇無內顧之憂人心自固不憂潰散其利一寇盜往往因糧於我故以掠地爲能惟聚鄉村之老弱婦女貨財米穀收入寨堡則敵野掠無所獲其勢易饑不能久掩其利一勸一邑之民捐輸修城則鄉居造爲城郭無與於鄉之說望勿前惟隨所在都鄙興築寨堡又不假胥吏之手則事必易集其利三有此三利何憚不爲且夫練兵貴練其膽數者練膽之方也膽堅則志奮志奮則事濟矣然築寨非團練已成則始事之防禦不備團練非寨堡已固則臨事之呼應不靈寨堡非董率有方則未事之渙散不一相其宜酌其通率此以往庶其有功抑又聞之世俗狃於習故難以慮始非以威制之則令不行而臨事制變先在乎賞罰嚴明重賞之下必有勇夫儲賞之費不可不豫顧富人多吝未肯輸貲破其慳貪損其有餘勿事姑息以成大防是在良有司迂謬之見惟閣下採之

粵西團練略序

龍啓瑞

今天子初元廣西羣盜之起蓋數年矣其芟夷擄滅大小以數十計比其訖事恆得力於民間之團練於是朝廷命順天府尹無錫鄒公鳴鶴巡撫吾粵鄒公因奏留今升布政使前廣西按察使調任甘肅按察使吳公鼎昌偕今升河南布政使前廣西右江道嚴公正基總理團練而以在籍紳士福建道監察御史朱琦翰林院侍講龍啓瑞聯屬其鄉之人使歸於率先是琦啓瑞嘗受命於前中丞鄭公祖琛董辦本邑團練至是始設局

省垣選擇紳士隨同委員周歷各郡提點勸諭凡數閱月而通省之團練普成於是章程冊籍蒼萃省局啓瑞擇其規條之尤善者與其公牘文字之有神時務及團名丁壯義烈事實可備他日掌故者分以四門彙爲一編名爲團練輯略爰執筆而爲之序曰自井田守望相助之法廢而衛民者專恃兵自兵力之不足始藉助於民間之團練團練者卽古寓兵於農之意而變通其法以適時用者也然考諸古自晉惠帝大安一年鎮南將軍劉宏討張昌始有義軍之名同時周圯賀循輩皆以薦紳先生起兵於家以討昌之黨石冰卒滅之南朝以來如裴駿魯悉達周迪之屬類以鄉兵捍賊取勝開元後府兵法廢諸州始團練民兵安史之亂諸州皆置團練使然當時之士兵多爲武夫悍卒所訕笑閒嘗推尋其故蓋有倡率則治無人倡率則敗威令之迫於上者鮮效義憤之激於民者有功其大較然也今粵西團練徧於外郡無所強之而事成有以導之而民從其故何哉被盜賊之患深保室家之情切而習於攻戰之事熟也蓋自道光二十一年後夷務起粵東粵西鄰省毘連地方大吏於梧州辦理防堵事平後壯丁失業猾黠之徒相聚爲盜煙販鹽梟之屬從而附和又外郡地多山場曠土嚮招粵東客民佃種數世後其徒益繁客主強弱互易其桀者或倡爲西洋天主教以蠱惑愚民用是黨滋益多州縣官欲繩以法則恐生他變欲據實上陳則規避處分而畏干時忌逮釀成大患則破敗決裂不可復治而斯時之民甚者或經十餘戰次亦遷徙數四弱者或流離轉死山谷強者則率其父老子弟與賊抗拒以保聚於鋒鏑之間蓋粵僻處荒裔王師調發難以時至本省兵馬各有守地顧此失彼輒不相及卽及之而兵力不足或用爲借助爲其嚮導比比而是然還是而富家巨室捐貲以助饒者丁壯冒白刃膏塗原野者紳士之督率奔走者或轉戰破賊經歲不家食者用民之力亦幾於盡又得文武大吏督兵壯剿除然後地方寇盜幾於蕩平 聖天子軫念邊隅嘉與粵西人士能自相捍衛紳民有殺賊立功者立予甄敘賞過其勞

殆爲吾輩初意所不及究其所以得此者固非一朝夕之故也後之覽者知其所由然則所以爲難之故蓋可識矣凡團練之精壯者大抵見賊多處也不然則民力之富厚者也不然則得賢有司倡率之者也三者不可得兼而就今日已成之事論之尤以賢有司爲急蓋有司賢則總團之紳士治總團之紳士治則分理之紳士治而一方之團練可得而治也有司不賢則視紳民如外物紳民亦從而外之甚則用不正之人參預其間雖已成之團練可以復壞夫民經流離散亡之後幸而恃有團練又賴賢大吏之力始可勸底於成至不幸有司不賢則可以壞之復歸於弊夫家有苦刃人知戰鬪用以殺賊則可愛反其道以行則甚可慮也事之弊則爲吏者有以藉口而斯民適受不韙之名又豈今日始事之所及哉然則是編之成固有待乎其人而非徒以成法待將來也旣以復於諸公遂質之待御而弁諸卷首

卮言一則

李祖陶

咸豐二年予家居無事遊行至省聞人譚湖湘間兵事賊氛甚熾言人人殊時楚督爲新建程晴峯先生有問當如何自處及江西省宜預備與否予謂晴峯釋褐以後自部員而至總督當督漕時剔除陋規聲名噪甚使日久於其任可繼清江楊勤恪公到今年踰七旬精力亦已衰矣當道光末年由雲貴移督兩湖任當自陳衰老力請退閒如浙閩總督劉公當無不允卽適有與鄰之警萬萬不宜規避則當長慮卻顧大展方略聘請老儒博古通今者以參謀議收召壯士翹關扛鼎者以爲爪牙申令提鎮參遊各選麾下士卒之勇健者用戚繼光束伍之法以訓練之節制分明器械犀利金鼓有節旂幟有章去歲適當粵警卽可鼓行而前與欽差大臣兩面夾擊不徒坐營自守以老我師則此烏合之衆自可一朝剿滅何至粵西糜爛轉而波及湖湘旣入湖湘則士民商賈望風逃潰永州衡州自難堅守師或左次理亦宜之語猶張巡由雍邱而退守睢陽也似長沙之

守必須牢固外有救援當必無患倘或不支則與城存亡知必有道以處此矣至於江西地方論者以爲賊必不來將由洞庭東下長江或由湖北漢水以向宛洛則僕竊不以爲然夫江西爲魚米之鄉不惟自給兼足資人倘如司馬錯伐蜀之策先取江西爲資則強而且富有何不可況兵法乘虛有聲東而擊西者韓信明修棧道暗渡陳倉鄧艾走陰平七百里無入之地皆其遺策此時武昌岳州必有重兵堵禦倘賊探知江西無備命一旅由袁吉而來則臨瑞震驚南贛隔在上游南昌必至坐困況穿江西之境由鄱湖以出大江其道尤遲倘直犯安慶池和以下並皆風靡賊踞金陵以爲巢穴稍稍截阻淮陽運道禍卽不可勝言故審度地勢懸揣賊情江西誠當先爲之備然爲備而但謀築省城而浚其濠尙爲下策夫江西之地環列十有二郡贛州踞其上游九江爲之門戶吉袁二郡貼近湖南今贛州九江皆設重鎮袁吉邊界亦皆調兵以守卡矣然承平之兵實不足以當賊而其騷擾反過於賊萬載盧翰坡太守之子近自桂林回來言粵西之兵全無技藝臨陣惟恃砲火遠見賊影卽將砲火放盡賊近則棄砲而逃周制軍雖手斬之而不能止且中鴉片之毒者多能披堅執銳者絕無其人粵兵如此湖兵可知而吾江西之兵更可知無已則團練鄉人實爲古法然攷之於宋韓魏公之義勇王介甫之保甲皆有其名而無其實近人之說亦徒紛紛吾意省會之地當先選將以練兵爲五人十人之長必才力過於五人十人者爲百人千人之長必才力過於百人千人又有智謀者練兵則悉照紀效新書之法以精神力貌選人而分別授之以器由隊長以上節節制之令士卒目皆識旌旂之色耳皆知金鼓之音分合進退一惟上之所令而不敢少梗於省會練兵三千盡成勁旅復擇其尤者分布各要郡要地令其以一教十以十教百以百教千如此則不惟省會有兵各郡亦皆有兵兵皆如父子兄弟之相依耳目手足之相習賊必聞風不敢入境而亦有以待之矣但欲練兵必先供餉欲供餉必先糾費欲糾費必先設局宜於省會立

一總局稟知大憲公請鄉大夫賢而有才者爲之主人賢而有文者爲之輔佐而又旁羅俊乂或善謀畫或工書寫或負勇力或精技藝或善走集或工闢探並皆收而養之以爲吾用省局既定卽頒其式于各府府又頒其式于各邑郡邑有警省出銳師以援之賊或由蘄黃下至九江則省兵出鄱湖以截之于以紓 聖天子一隅之憂而並可爲東南數千里應援之助豈不美哉詩云迨天之未陰雨徹彼桑土綢繆牖戶若待臨旱而後掘井晚矣世有知道之君子必不以予言爲早計也東五選兵之法其說甚長予別有述茲不具贅

涇縣包慎伯集中有鄉兵對一篇謂練鄉兵有七病一恐藉民爲兵糧難繼給二恐揀閱鈍弱罰不可勝三恐強梁之徒欺凌爭鬥四恐率長恃衆挾制官長五恐奸民煽之或至不測六恐鹵莽撥調遇敵則潰七恐事靖當罷人無所歸欲去七病而收其功須用己說其說謂州縣親民之官須減從下鄉喚集各鄉知事祔耆賜坐與食面諭以盜賊之害團結之利使鄉民曉然共信官長籌備保全而無調遣陣鬧之患其法于巡鄉時一面給門牌查戶口以二十五丁爲一甲立其素爲民所服者爲甲長甲冊成乃議派兵古法三丁抽一今州縣十大以上五十以下之丁壯常過十萬五而派之邑可得一萬人五人爲伍五伍爲兩兩置長揀甲首點充兼督教閱不附兵額憂患相卹善惡相保坊郭工商一律編派兵法四兩爲卒鄉兵恐人多難制故相卹相保至兩而止二兩立一師擇兵之能者或武生及邑之有材技充當優給餉食教以技仗部伍貧富必均其役不入伍而願學者聽古富者出錢貧者出力之說斷不可用其有好義願輸兵需者從優獎勵不願者勿強各兩彙冊呈令令據總冊割爲幾鄉鄉各千餘人各度曠地爲演武場每季就閱其輪派應閱之人兩長呈單備點師名填于兩冊之端閱時不精技仗坐師不遵約束坐長優等多者師與長有賞閱法比營賞法加厚罰差薄行之必信其兇橫滋事者兩長白于閱時按律重懲間有出衆之能數閱後卽申請

褒異拔于營標收用以明收材技之益陰除驚悍之害閱畢照文課例標示優等于鄉盡兵有常數而無常
人則無逃籍與無事而食之患而有人皆習兵兵皆可用之效令閱兩載之後守于仲冬就縣一閱賞罰如
縣縣閱于鄉甲日發乙鄉牌乙日發丙鄉牌府閱于縣間一日離城遠者往來不過三日公堂發飯食錢二
百四十文每里所需歲不過三十千文捐公自辦不經吏手勸諭應不甚難也夫家結爲伍伍結爲兩比戶
相爲保卹雖無賴羣橫所向而皆遇其敵流匪聞之勢必遠竄來則人自爲戰據險拒之易易耳包說如此
與威說不同蓋威之法精練官兵以破滅寇盜者也故用東伍之法以嚴其節制包之說團結鄉勇以保全
地方者也故用保卹之情以密爲聯絡節制者將軍督撫之事保卹者郡守州縣之事合兩法而用之天下
幸無事矣予故節錄之以備用

答某友書

熊少牧

書至承詢保甲事宜知邑侯舉行保甲聞足下賢能具禮屬爲保長此周官黨正閭閻師縣正之職與州縣
相助爲理者也保甲法自成周迄兩漢後魏盛唐明初皆循之勸善良詰奸慝課作息謹守望以鄉人治鄉人
耳目近而情誼親洵政之至善於民有利而無害者然行之或恐其擾而弊且滋甚則董事不得其人耳廉明
公慎如足下旣嘗取于清端陸清獻張清恪王伯奢諸儒先之論研究其理隨時制宜矣迂疏如不佞亦勤勤
焉就而商之抑何虛衷斂氣乃爾邪因辱下問敢舉所目擊而忽然私憂者與參末議焉吾鄉距行臺省百里
川原明秀田壤沃饒居氓業耕讀頗知自愛無奢靡皆緣佻儇之習乃歲久齒繁俗替濡染游深其不軌有三
端及今挽之或不至江河日下乎一洋煙之流毒也鴉片製自外夷購以重值燐爲煙膏偃臥卽燈燭力吸之
熱蓄五內成癮按時必吸斷之則疾垂死面鰲形槁萎茶不任操作始爲豪有力者能致浸假中下戶皆耽之

老少男女貪嗜無忌津亭卹肆設館爲閭士落殖農輟耒婦休蠶織迨卓錫無地銅瘠轉增黠而穿窬賤而倚市罹罪罟數彛倫勢不至轉棄溝壑不止嗟乎狡夷造此以厲中國其深謀譎算豈僅在囊括內地之財貨而已哉乃閭者不悟甘以身殉此輩原無足惜其隱禍豈有極耶一神祀之詔瀆也里社蜡大儺報司嗇宣時氣禮也至若民所瞻仰民所取財用暨以死勤事以勞定國禦大菑并大患在祀典諸神則天子諸侯建國置都設廟祧壇墀而祭之以爲民祈福非閭閻所敢擅祀沿至近代祠宇所在多有謂忠孝節義秉彝攸好瞻禮足以興發其志意猶之可也卽蒞藻以昭忠信君子亦嘉予焉顧今之奉神不然廣廈文榱瑋閎輪奐雕塑土木魁然鬚眉瓊弁褰衣金輿纓幔又或磔髻努目或靚飾仙姝成幻變有生氣儀仗之盛儼踰無等歲正月初吉天貺日中秋節必出行香靈旂辟塗葆蓋簇列鼓吹風曳鑼煙霧噴遠近結綵龍攢護有長至十餘丈者烏槍雖厲禁亦盈千累百響震山谷觀者舉國若狂抵迎祀之家牲牢犒勞壺殮之費衆視其豐齋爲喜怒每行香一次綜計所耗不下三百餘萬錢歲歲有贏無絀神聰明正直其能罔怨恚乎他如爭道忿鬪斂貲斂沒以致鬪訟牽連在所不免尤可咤者村人寒暑遊疾輒禱神夜醮縛一豕覆以病者褻服鉦聲角聲判豕聲巫師唱喝聲交作比鄰亞旅秉炬火譟囂馳幽谿叢薄呼魂歸魂歸病者呻吟牀褥如痴如夢幸而遇醫霍起推功神佑往往有禱未畢而奄逝者余一燈兀坐幾於無夕不聞嘯神耶魅耶人爲之耶又烏從而知之蓋鄉愚惑於石言莘降史冊可徵而僧道復侈言因果報應以投其好而堅其信列子謂楚人鬼班固謂湘沅之間重淫祠繇此觀之信矣右二端皆足下聽觀所及盍達之令長令長因達之大吏嚴加法禁庶弊可去其太甚歟願嘗究推其故要緣於不明理不明理緣於不讀書不讀書緣於不擇師故吾終舉一端則塾師之濫忝也古者家塾黨庠術序務延鄉大夫之賢而老者主之凡入大學遞升俊選士者胥自小學植其基勸漢之專師才之

大儒初必循循焉小學是講所謂登高自卑陟遐自邇也卽今制以科目取士求工帖括其師類能則古稱先訓門下士精探六經四子書之旨發而爲言因文見道故常成就偉才明體達用爲國家棟幹詎意教術流失以來小學悉廢村夫子冬烘頭腦授受庸猥甚至屠酤小販方外飢寒無賴之徒茫不解義內則弟子職爲何語亦抗顏號召童蒙以資餬口所課別有俗本詭言破句鄙俚不倫彼田翁圃叟利其利而禮簡使子若孫從之游卒之咄嗟二三年仍一丁不識或稍長知自振勵時過無及且童時先入者爲之主心蔽日豐夫何怪其瞽於所處不審其義之當爲不當爲哉然則塾師之關繫良非淺鮮天下事有似輕而實重似緩而實急者此類是也足下周旋梓里所接晤諸父老可將擇師之道懇切申明將教修經正經正民興前二端亦不待懲誡而媿悔自生他日采風便當頌吾鄉爲小鄒魯矣以外若武斷鄉曲開場縱博訟師土猾私習天主等教保甲條約已詳不贅

覆文任吾書

曾國藩

團練之事極不易言鄉里編戶民窮財盡重以去年枯旱十室九饑與之言斂費以舉團事則情不能感說不能動威勢不能劫彼誠朝不謀夕無錢可捐而又見夫經手者之不免染指則益含怨而不肯從事故國藩此次辦法重在團不重在練團者卽保甲之法也清查戶口不許容留匪人一言盡之矣練則必製器械造旗幟請教師揀丁壯或數日一會或一月一會又或厚築礮堡聚立山寨皆大有興舉非多斂錢文不可方今百姓窮困無生可謀治之者當如養久病之嬰兒攻補溫涼皆難驟進風寒飲食動輒爲咎故鄙意重在團不重在練抑且不遽重在團而先重在辦土匪我不能有利於民但去其害民者而已而害民之中又擇其尤甚者如尊書中所謂會匪頭目搶案首犯斬刈無赦其餘可宥原者皆行保釋最爲得體舍粵匪而求脅從舍豺狼而

問狐狸此近來大不平之事也勸捐之說苦無簡明條例不足取信於鄉人條例必須自戶部乃可據爲典要此間亦無刊定要例不若就鄉人所願爲之官顯得之封典告知省城主持此事之人然後較量多寡以定從違其可捐之戶亦須擇其尤富者至少亦須大錢一千串乃可起捐庶小戶無勒派之弊而國帑有尺寸之補李筱泉年兄醇厚明白僕所深知若得諸君子相助爲理必有可觀足下所代作告示都爲妥善惟第七條按戶出丁到處練藝尙與鄙見不合鄙意各鄉但行保甲之法團而不練惟城廂則操練一二百人以資剿辦土匪之用待歲月稍久民心信從然後層層引入庶費不多而事易集耳

上督撫憲緊要事宜歸入善後籌議五條

魁 聯

謹將寶郡目前緊要事宜就卑府管見所及有當歸入善後章程一併籌議者酌擬五條恭呈鑒核
一善後章程應通盤籌畫以期一勞永逸也寶郡轄一州四縣幅員遼闊民搖雜處昆連粵西自藍正樽曾如
灶等迭次滋事之後刁悍之風日甚一日比年滋事雖俱在新甯而寶屬所慮實不止新甯一縣訪聞武岡
一帶痞棍藉保地方民食爲名私立關卡沿河阻搶與淑浦黔陽交界之區尤匪徒叢集若不乘此通盤籌
畫徹底查辦不特患等養癰並恐憂在眉睫

一地方痞匪請大張告示俯准就地懲創也痞匪慙不畏法由來已久若拘泥成例一一辦案不特訟獄滋繁
囹圄充塞而且情重法輕稽延時日惟有拏獲審實登時處死一法方足以快良民之心而懾羣民之膽擬
請憲恩俯賜大張告示俾地方官有所遵循而匪徒稍知敬畏此亦先聲奪人辟以止辟之意

一慎重緝捕擬酌籌經費俾資召募訓練也痞匪之多由於地方官捕拏不力其捕拏之不力者半由無人半
由無費訪聞此等痞棍多有軍械呼嘯成羣動盈千百斷非差役所能捕拏若輕易會營不特犒賞維難而

且事多牽制且營兵衙役之中卽大半與痞棍通氣擬仿照苗疆練勇量爲變通酌於鄉勇中選募五百人配給衣糧器械府州縣分領隨時訓練專司捕拏痞棍匪徒不准承辦差票各縣所領春秋二季送府考驗寶慶府所領由長寶道考驗若地方官督率有方認真訓練其收效可與鎮草練勇相等以之捕拏痞棍較之兵役亦易得力惟寶慶雖屬犴疆究與苗防有間若歸部議必格不行而整頓地方似非此不可且此項經費雖爲數不貲然一二年間果能匪棍絕跡卽可徐議裁汰較之頻年竊發重煩徵調所省較多惟目前如何籌措應否歸於善後案內核議辦理之處伏候鈞裁

一各縣城垣宜修葺完固以壯保障觀瞻也新甯城樓上年兵勇圍攻時放火燒燬固應趕緊修築卽寶慶郡城週圍查勘亦坍塌過甚不特保障所資抑且觀瞻所係或籌款興工或設法勸捐均屬目前要務再新甯衙署及千總營房考棚多被匪徒拆毀均係棲止公解且亟須開考似應請飭其迅速興修歸於善後案內辦理

一各縣保甲應認真編查以備荒政棘手也保甲之法本爲弭盜安良之善政惟地方官奉行不善假手丁胥差保則無益於民而徒滋騷擾寶慶地方最慮旱災當此豐稔之時民情尙易浮動若稍值偏歉大勢洶洶匪徒從中播弄尤易釀成事端擬乘此大兵甫竣將各境匪徒盡法懲辦之後卽督飭各牧令教難編查保甲先訪每鄉公正紳耆交給牌冊告以清理地面保護身家之意其十家之中互相查填出結一鄉造完卽將簿呈繳地方官便道抽查量加懲勸倘一家之中有不安本分之人其劣跡昭著者准紳耆送案懲治若劣跡未著紳耆但不敢保結卽令其九家互結此一家另自出結隨時察看辦理寬其期限不許在官人役干預愚民雖難與慮始易與圖終但得一二鄉辦理妥善則各鄉自踴躍從事一半年之間果能次第辦竣